

TEZAUUR LITURGIC
3 FEBRUARIE

ACATISTUL
SF. IERARH
IGNATIE GAZADINI,
MITROPOLITUL
GOTHIEI CRIMEII
II



MOSCOVA, 2000



АКАФИСТ

Святителю Игнатию

Мариупольскому, митрополиту Готфейскому и Каффайскому

Кондак 1

Избранный чудотворче и града Мариуполя
незыблемое основание, на небеси предстоя
Святей Троице, приими песни и пения наша
хвалебныя, и светом небесным озари сердца чад
твоих, любовьию вопиющих ти сице:
Радуйся, Игнатие, пастырю добрый и дивный
святителю Христов.

Икос 1

Ангельскому поревновавши житию, святителю
отче Игнатие, любовьию разжегл еси сердце твое,
и яко серафим, молитвою пламенеющий, огнем
Божественнаго Утешителя озаряеши души всех,
пение сицевое тебе приносящих:
Радуйся, пастырю всеславный,
Радуйся, наставниче премудрый;
Радуйся, Христа преславный ученичѣ,
Радуйся, апостольских престолов наследниче;
Радуйся, ангелом сомолитвениче,
Радуйся, пророков сотаиниче;
Радуйся, святителей украшение,

Радуйся, всех христиан утешение;
Радуйся, Игнатие, пастырю добрый и дивный
святителю Христов.

Кондак 2

Видети потщался еси, еже око земнородных не
виде, и слышати возжелел еси, еже не возможе
слышати человек, на небеса добродетельми
возшел еси, с безплотными песнь приносяще
Богу: Аллилуиа.

Икос 2

Разум имуще, благодатию Утешителя озаренный,
не о земном мудрствовати тщался еси, но
небесныя мудрости взыскав, во одежду жития
иноческаго облеклся еси и всего себе в жертву
всесовершенную Богу и Спасу своему принесл
еси, сего ради похвалы воспеваешия сицевыми:
Радуйся, суету мирскую отринувый,
Радуйся, небесное житие восприемый;
Радуйся, иноческаго жития ревнителю,
Радуйся, демонскаго нечестия посрамителю;
Радуйся, отцем древним подражавый,
Радуйся, благодать небесную стяжавый;
Радуйся, на высоту безстрастия возшедый,
Радуйся, страстей пламень угасивый;
Радуйся, Игнатие, пастырю добрый и дивный
святителю Христов.

Кондак 3

Сила Господня и милость Его в немощи твоей явлена бысть, отче преславне Игнатие, и ангельстии лица удивишася крепости твоей и демонский полки возрыдаша, побеждени бывше молитвою твоею: Аллилуиа.

Икос 3

Имуще талант веры, от Небеснаго Домовладыки ти данный, яко раб добрый и верный приумножил еси его и люди твоя ко Христу привел еси, от нихже похвалы слышиши сицевыя:

Радуйся, дүши наша Словом Божиим просветивый,

Радуйся, сердца наша питием благочестия напоивый;

Радуйся, неисчерпаемый премудрости источниче,

Радуйся, Вечнаго Евангелия всехвальный благовестниче;

Радуйся, яко тобою истина познавается,

Радуйся, яко молитвою твоею благодать верным подается;

Радуйся, Православныя веры хранителю,

Радуйся, людей христоименитых защитителю;

Радуйся, Игнатие, пастырю добрый и дивный святителю Христов.

Кондак 4

Буря искушений и страстей волнения тщетны о тебе явишася, отче преславне, иже ты силою всесладкаго имени Иисусова победил еси, непрестанно песнь победную Господу принося: Аллилуиа.

Икос 4

Услыша Господь глас сердца твоего, иже песнь любви выну пред престолом Его воспеваше, и на новый подвиг тя призва, благодать служения архипастырского ти подавая. Темже паства, избранника воистину тя Божия ведуще, похвалы ти приносит:

Радуйся, святителю наш добрый,

Радуйся, отче милостивый и кроткий;

Радуйся, крест святительства от Господа приявый,

Радуйся, бремя архипастырства на рамена своя возложивый;

Радуйся, образе жития несквернаго,

Радуйся, явление служения непорочнаго;

Радуйся, благодати источниче неоскудеваемый,

Радуйся, милости кладезю неистощимый;

Радуйся, Игнатие, пастырю добрый и дивный святителю Христов.

Кондак 5

Богодарованнаго и благодатнаго святителя
своего тя разумеюще, люди православнии яко
избранника Христова и Ангела церкви
Готфейския тя прияша, Дивному во святых
Своих Богу благодарение о тебе приносяще:
Аллилуиа.

Икос 5

Видевше пламень любви, еюже сердце твое
разженно бысть, новаго тя Моисея призва
Господь, да люди твоя от рабства агарянского
изведеш и от нечестия избавиши и от бед
свободиши всех, вопиющих ти:
Радуйся, огненный столпе, во тьме
светлосияющий,
Радуйся, путь истинный нам указующий;
Радуйся, звездо, верных к Богу путевожущая,
Радуйся, солнце, путь ко Христу освещающее;
Радуйся, от прелести вражия избавляющий,
Радуйся, на стези правды нас наставляющий;
Радуйся, милостей Господних явление,
Радуйся, благоутробия Божественнаго знамение;
Радуйся, Игнатие, пастырю добрый и дивный
святителю Христов.

Кондак 6

Проповедует град Мариуполь славу и милосердие Господне, чрез служение твое явленныя, Церковь же Православная подвигом твоим украшается и вселенная вся благодарение о тебе Богу возсылает: Аллилуиа.

Икос 6

Возсиял еси яко свеща многосветлая, на свещник кафедры архиерейския Господом поставленный, да житием и подвигом твоим свѣтиши всем, взывающим ти сице:

Радуйся, светом небесным озаренный,

Радуйся, благодатию Божией освященный;

Радуйся, правды Христовой ревнителю,

Радуйся, Евангельския любви служителю;

Радуйся, града Мариуполя основание,

Радуйся, земли нашея утверждение;

Радуйся, страны элинския преславное прозябение,

Радуйся, Церкви Русския всечудное украшение;

Радуйся, Игнатие, пастырю добрый и дивный святителю Христов.

Кондак 7

Хотением возжелел еси ясти Пасху Господню и Вечери Тайныя причастник быти со апостолами, темже ныне, на брак Агничий возшедый и

вкусивый вечныя сладости в пренебесном Царствии, со апостолы и всеми святыми поеши Христу: Аллилуиа.

Икос 7

Новаго Иерусалима достигл еси отче, путем шествуя заповедей Христовых. Ныне же, в незаходимой славе сияюще и Бога выну зряще, к Нему путь указуеши всем, поющим ти сице:

Радуйся, спасения многих взыскавый,

Радуйся, вся любовьию объявый;

Радуйся, Отечества земнаго верный сыне;

Радуйся, Небеснаго Иерусалима преславный гражданинне.

Радуйся, Архиерея Вечнаго служителю всеусердный;

Радуйся, Небеснаго Домовладыки рабе благий и верный.

Радуйся, жатвы Господней делателю неленостный;

Радуйся, о людех православных молитвенниче предивный.

Радуйся, Игнатие, пастырю добрый и дивный святителю Христов.

Кондак 8

Страннолюбия Владычня и безсмертныя трапезы на горнем месте Сиона вкусил еси, отче

наш Игнатие, и ныне к радости Пасхи Вечныя призываеши всех нас, пети научая Христу Господу ангельскую песнь: Аллилуиа.

Икос 8

Весь освятился еси огнем благодати Духа Всесвятаго и явился еси храм боголепный Божественныя Троицы, добродетельми светлоукрашенный. Темже молитвою твоею и нас от всякия скверны очисти, да похвалу ти непрестанно приносим:

Радуйся, молитвами твоими освящающий,
Радуйся, огня геенскаго нас избавляющий;
Радуйся, фимиаме молитвы сладкоуханный,
Радуйся, сосуде, благодатию исполненный,
Радуйся, крине прозябения райскаго,
Радуйся, лозо вертограда Эдемскаго;
Радуйся, росе, еюже огонь безбожия угашается,
Радуйся, море, имже зловерие потопляется;
Радуйся, Игнатие, пастырю добрый и дивный святителю Христов.

Кондак 9

Всякия скорби претерпел еси, отче богомудре Игнатие, со Апостолом вопия: вся могу о укрепляющем мя Иисусе. Темже от скорби многомятежныя мира сего свободи ны, чада твоя духовныя, да с тобою купно возможем

песнь Спасу и Христу приносить Аллилуиа.

Икос 9

Витийствующие уста не возмогут по долгу
память твою похвалити, како же мы
недостойнии пение ти дерзнем немощное
принести, обаче, любовью побеждаеми, со
смирением тя ублажаем:

Радуйся, любовь твою всему миру возсиявый;

Радуйся, добродетельным житием вся
облиставый.

Радуйся, пищею райскою нас насыщающий,

Радуйся, питием бессмертия напаяющий;

Радуйся, скорбных утешение,

Радуйся, заблуждающих вразумление;

Радуйся, недугов врачевание,

Радуйся, в трудах вспомошествование;

Радуйся, Игнатие, пастырю добрый и дивный
святителю Христов.

Кондак 10

Спасения нашего буди ходатай, отче преславне
Игнатие, вемы бо тя воистину дивнаго
предстателя пред Престолом величества
Божия, темже Владыку всяческих моли о граде
твоем и о всем мире, да в тишине и умилении
поем Ему: Аллилуиа.

Икос 10

Стена прилогов вражих молитвою твоею
разорена бысть, отче наш всеславный Игнатие и
людие, тобою от недугов и скорбей избавление
приемлюще, пения ти приносят и славословия
сицевые:

Радуйся, мечу, злочестие посещающий,

Радуйся, щите, верных ограждающий;

Радуйся, дела наша к славе Божией
исправляющий,

Радуйся, к доброделанию всех призывающий;

Радуйся, благочестия насадителю,

Радуйся, злочестия обличителю;

Радуйся, крепкое падающих возведение,

Радуйся, право стоящим утверждение;

Радуйся, Игнатие, пастырю добрый и дивный
святителю Христов.

Кондак 11

Пение уст твоих, от избытка сердца Господу
возносимое, яко жертву благоприятную, яко
фимиам многоценный прият Вседержитель.
Тако и ты моление наше немощее прими и
славословие уст недостойных исправи, да
неосужденно взываем Дивному во святых Своих
Господу: Аллилуиа.

Икос 11

Светолепною ризою спасения и одеждою нетления облече тя Христос Спас и Владыка, и венцем небесным увенча главу твою и лику избранных причте; темже в славе Царствия Небеснаго слышиши похвалы сия:

Радуйся, Царствия Христова наследниче,

Радуйся, Пасхи вечныя причастниче;

Радуйся, яко тобою бесовския полки отгоняются,

Радуйся, яко тобою верныя радости исполняются;

Радуйся, яко тобою от напастей избавляемся,

Радуйся, яко тобою благодати сподобляемся;

Радуйся, яко предстательством твоим жизнь вечная обретается,

Радуйся, яко молитвами твоими вера истинная познавается.

Радуйся, Игнатие, пастырю добрый и дивный святителю Христов.

Кондак 12

Благодать Господня, яже присно немощная врачует и оскудевающая восполняет, обильно на тя излиана бысть от Щедродателя Бога, темже, яко семя доброе, мног плод принесл еси Божественному Сеятелю, Ему же с тобою пение приносим: Аллилуиа.

Икос 12

Воспевающе песни духовныя, со ангельскими лики Господу благодарение приносим, яко даровал есть нам тя многоценное сокровище и предстателя о пастве твоей, яже ти присно похвалы возсылает:

Радуйся, заступление наше всекрепкое,
Радуйся, пение наше хвалебное;
Радуйся, чад твоих радости,
Радуйся, земли нашея сокровище;
Радуйся, ликом ангельских веселие чудное,
Радуйся, народа Божия похвало всеславная;
Радуйся, всех любовью своею объемлющий,
Радуйся, приходящих радостно приемлющий;
Радуйся, Игнатие, пастырю добрый и дивный святителю Христов.

Кондак 13

О, преславне и всечудне отче наш Игнатие, немощных устен пение недостойное днесь от любви ти приносимое прими и от всякаго зла ны неврежденны сохрани, да молитвою твоею присно укрепляеми, невечерняго дне Царствия Христова достигнем и с тобою пети сподобимся:
Аллилуиа.

Сей Кондак глаголется трижды; таже Икос 1 и Кондак 1.

МОЛИТВА

О, великий Святителю и пастырю наш добрый, молитвенниче всея земли Приазовския и града Мариуполя основателю, отче священнейший Игнатие! К тебе смиренно припадаем и усердно молимся: яви нам, грешным, любовь твою отеческую и многомогущее твое заступление. Испроси предстательством твоим у Всемилостивого Бога нашего вся яже на пользу душам и телесем нашим, согрешений наших прощение, любовь нелицемерную, ревность о спасение нашем, да благодатию Его Божественною соблюдаеми и спасаеми, славу, благодарение и поклонение возсылаем Отцу и Сыну и Святому Духу, ныне и присно, и во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДНИЦЕ
АРХАНГЕЛАМ
И АНГЕЛАМ**

І

**ИКСУС
* ИКСУС**